

SOALAN NO. 27

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : DATO' AHMAD FAUZI BIN ZAHARI
[SETIAWANGSA]**

TARIKH : 10 NOVEMBER 2014 (ISNIN)

SOALAN :

Dato' Ahmad Fauzi bin Zahari [Setiawangsa] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian mempunyai sebarang perancangan untuk membina taska atau rumah asuhan kanak-kanak di semua jabatan Kerajaan sebagai satu kaedah untuk membantu mengurangkan kos sara hidup yang semakin meningkat pada waktu ini. Atau sebarang perancangan lain bagi mengurangkan kos asuhan anak-anak.

JAWAPAN:

Tuan Yang Dipertua,

Adalah menjadi hasrat dan perjuangan Kementerian Pembangunan Wanita, Keluarga dan Masyarakat (KPWKM) supaya lebih banyak taman asuhan kanak-kanak (TASKA), khususnya di tempat kerja dibuka. Langkah ini penting memandangkan kos sara hidup semakin meningkat pada waktu ini. Di samping itu, kos bagi mendapatkan pembantu rumah adalah tinggi.

Usaha-usaha Kerajaan untuk membantu mengurangkan kos asuhan anak-anak adalah seperti berikut :

1. Subsidi Yuran Pengasuhan TASKA Tempat Kerja Awam

Kerajaan melalui Pekeliling Perkhidmatan Bilangan 38 Tahun 2013 memberi subsidi yuran pengasuhan TASKA sebanyak RM180 sebulan bagi seorang anak kepada anggota perkhidmatan awam yang pendapatan isi rumah tidak melebihi RM5,000 sebulan.

2. Subsidi Yuran Pengasuhan TASKA Institusi Swasta

Pada tahun 2014, Kerajaan telah meluluskan pemberian Subsidi Yuran Pengasuhan sebanyak RM250 sebulan atau mengikut kadar sebenarnya yuran yang dikenakan oleh sesebuah TASKA. Kadar maksimum ialah bagi dua (2) orang anak dalam sesebuah keluarga. Syarat kelayakan ialah pendapatan isi rumah tidak melebihi RM900 perkapita sebulan. Jabatan Kebajikan Masyarakat telahpun meluluskan RM13.1 juta bagi 4,609 orang kanak-kanak.

3. Penubuhan TASKA di Tempat Kerja Sektor Awam

Bagi membuka TASKA di tempat kerja sektor awam, Jabatan Perkhidmatan Awam (JPA) telah mengeluarkan Pekeliling Perkhidmatan Bil. 6 Tahun 1989, iaitu Kebajikan Untuk Anggota-Anggota Perkhidmatan Awam yang menghendaki kementerian, jabatan dan agensi Kerajaan menubuhkan TASKA di tempat kerja.

4. Geran Penubuhan TASKA Tempat Kerja Sektor Awam

Buat masa ini Kerajaan telah memberi geran pelancaran penubuhan TASKA di tempat kerja sektor awam sebanyak RM200,000 untuk setiap kementerian, jabatan dan agensi kerajaan.

5. Bantuan Khas @ 'One Off'

Kerajaan juga telah meluluskan pemberian Bantuan Khas atau 'one off' iaitu RM100 sekaligus kepada seorang kanak-kanak yang berdaftar dengan TASKA institusi swasta. Tujuannya ialah untuk meringankan bebanan ibu bapa atau penjaga semasa membuat pendaftaran. Jabatan Kebajikan Masyarakat telahpun meluluskan RM1.06 juta bagi 10,618 orang kanak-kanak.

6. Subsidi Bagi Taska 1Malaysia

Peranan Kerajaan juga tidak terhenti di situ sahaja di dalam menjaga kebijakan anggota-anggota perkhidmatan awam. Bagi meringankan kos sara hidup yang dihadapi oleh anggota-anggota perkhidmatan awam terutama di dalam menghadapi masalah penjagaan anak-anak mereka semasa bekerja, Kerajaan telah menyalurkan RM2.8 juta bagi pemberian subsidi yuran pengasuhan kepada 44 buah TASKA 1 Malaysia di seluruh negara. Subsidi hanya diperuntukan bagi 30 orang kanak-kanak bagi setiap TASKA 1Malaysia. Kadar subsidi yuran pengasuhan adalah sebanyak RM180 sebulan. Subsidi ini terbuka kepada masyarakat atau anggota-anggota perkhidmatan

awam yang tinggal di luar bandar dengan pendapatan RM1,200 sebulan dan RM2,000 yang tinggal di bandar.

Secara kesimpulannya, Kerajaan amat perihatin di dalam membantu mengurangkan kos asuhan anak-anak terhadap anggota perkhidmatan awam. Ini dapat membantu mengurangkan bebanan kos sara hidup yang semakin meningkat pada waktu ini.